

— 506 —

Wir Claus Zorn dem man spricht Lappe, ritter, Claus Maler ein edelknecht, vnd Bertolt Zorn dem man spricht schultheis, ritter, tuont kunt allen den, die disen brief sehend oder hörend lesen. Daz wir vmbte semliche getat vnd geschicht, so zem Wiher geschehen ist, vnd vmb die totslege, so an Johann Zorn dem man sprach Lappen, min des egenanten Claus Zornes sun, vnd an Cuone Maler seligen, min des obgenanten Claus Malers sun, geschehen sint, vnd vmb solich name vnd verlust, so vns vnd mir dem vorgeanten Bertolt Zorn, dem man spricht schultheis, an dem vnsern zem Wiher geschehen ist, gesünet, geriht vnd geslichtet sint luterlich, mit dem meister vnd dem rate von Friburg, vnd iren burgern, fründen vnd eitgenossen. Vnd gelobent ouch für vns, vnser frünt, vnd für alle vnser nachkommen, gegen inen, iren fründen, vnd eitgenossen, vnd allen iren nachkommen, dieselbe suone vnd rihtigunge, von der egenanten getat vnd geschicht wegen, als zem Wiher geschah, nu vnd eweliche rest vnd stete ze haltende, vnd da wider niemer ze redende noch ze tvonde, noch von ieman schafften getan werden in deheinen weg ane alle geuerde. Vnd daz diß war vnd stete blibe, darvmb so han wir, Claus Zorn dem man spricht Lappe, ritter, des vorgeanten Hans Lappen seligen vatter, vnd ich Claus Maler ein edelknecht, des vorgeanten Cuonen seligen vatter, vnd ich Bertolt Zorn ritter, vnser ingesigele gehenket an disen brief, der gegeben wart an dem nehsten samstige nach sant Hilarien tag, des iares do man zalt von gotz geburt, drüzehen hondert ehtwe vnd sehzig iar.

Die Siegel beider Urkunden sind wohl erhalten.